

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ ԵՐԻՏԱՍԱՐԴԱԿԱՆ ԽՈՐՀՐԴԻ ԿԱՆՈՆԱԿԱՐԳ

1. Ընդհանուր դրույթներ

1.1. Հայաստանի Հանրապետության փաստաբանների պալատի Երիտասարդական խորհրդի (**այսուհետ՝ Երիտասարդական խորհուրդ**) կանոնակարգը (**այսուհետ՝ Կանոնակարգ**) սահմանում է Երիտասարդական խորհրդի գործունեության կարգը:

1.2. Երիտասարդական խորհուրդն իր գործունեությունն իրականացնում է Հայաստանի Հանրապետության Սահմանադրության, Հայաստանի Հանրապետության օրենսդրության, Հայաստանի Հանրապետության փաստաբանների պալատի (**այսուհետ՝ Պալատ**) կանոնադրության, դրանց համապատասխան ընդունված իրավական ակտերի և սույն Կանոնակարգի դրույթներին համապատասխան:

2. Երիտասարդական խորհրդի նպատակը

2.1. Երիտասարդական խորհուրդը հասարակական հիմունքներով գործող խորհրդակցական մարմին է, որի նպատակն է՝

ա) աջակցել վերջին երեք տարում փաստաբանական գործունեության արտոնագիր ստացած և հետագայում նոր արտոնագրեր ստացող փաստաբանների (**այսուհետ՝ Երիտասարդ փաստաբաններ**)՝ մասնագիտական ոլորտում ինտեգրման գործընթացին,

բ) վեր հանել Երիտասարդ փաստաբանների մասնագիտական գործունեության ընթացքում առաջացած խնդիրները, ներկայացնել Պալատին և աջակցել դրանց լուծմանը,

գ) նպաստել Երիտասարդ փաստաբանների և փաստաբանների համագործակցությանը, Երիտասարդ փաստաբանների և փաստաբանների ոչ մասնագիտական շփումներին (կազմակերպել ոչ պաշտոնական հանդիպումներ, տարաբնույթ մշակութային և ժամանցային միջոցառումներ),

դ) կապեր հաստատել այլ երկրներում գործող նմանատիպ կառույցների հետ:

3. Երիտասարդական խորհրդի կառուցվածքը

3.1. Երիտասարդական խորհուրդը կազմված է նախագահից և վեց անդամից:

3.2. Երիտասարդական խորհրդի նախագահին և անդամներին նշանակում է Պալատի նախագահը՝ երկու տարի ժամկետով: Երիտասարդական խորհրդի նախագահ կամ անդամ կարող է նշանակվել ցանկացած փաստաբան, որի արտոնագիրը կասեցված չէ:

4. Երիտասարդական խորհրդի գործունեության կազմակերպումը

4.1. Երիտասարդական խորհուրդն իր աշխատանքները կազմակերպում է նիստերի միջոցով: Նիստերը հրավիրում և նախագահում է Երիտասարդական խորհրդի նախագահը՝ իր կողմից հաստատված օրակարգով: Նիստերը կարող են հրավիրվել նաև Երիտասարդական խորհրդի անդամների նախաձեռնությամբ:

4.2. Նիստերը կարող են կազմակերպվել նաև առցանց եղանակով: Առցանց եղանակով աշխատանքներն իրականացվում են էլեկտրոնային փոստերի, սոցիալական ցանցի կամ կապի այլ միջոցներով: Սոցիալական ցանցերում աշխատանքներն իրականացնելու նպատակով Երիտասարդական խորհրդի նախագահի կողմից համապատասխան սոցիալական ցանցում ստեղծվում է խումբ:

4.3. Երիտասարդական խորհրդի նիստի օրակարգի, նիստի տեղի, օրվա ու ժամի մասին ստանում են ծանուցում՝ ոչ ուշ, քան նիստի անցկացման օրվանից մեկ օր առաջ: Ծանուցումը կատարվում է էլեկտրոնային փոստ ուղարկելու կամ սոցիալական ցանցի համապատասխան խմբում տեղադրելու միջոցով: Առցանց նիստ հրավիրելու դեպքում ծանուցման մեջ նշվում է օրակարգը, նիստի օրը և քվեարկության ավարտի ժամը: Երիտասարդական խորհրդի նիստն իրավագոր է, եթե դրան մասնակցում են Երիտասարդական խորհրդի անդամների առնվազն երեքը և Երիտասարդական խորհրդի նախագահը:

4.4. Երիտասարդական խորհրդի որոշումները կայացվում են քվեարկությանը մասնակցած անձանց ձայների պարզ մեծամասնությամբ՝ բաց քվեարկությամբ: Ձայների հավասարության դեպքում Երիտասարդական խորհրդի նախագահի ձայնը վճռորոշ է:

4.5. Քվեարկության դրված յուրաքանչյուր հարցի վերաբերյալ քվեարկության մասնակիցներն իրենց դիրքորոշումն արտահայտում են քվեարկելով «կողմ», «դեմ» կամ «ձեռնպահ»:

4.6. Երիտասարդական խորհրդի նախագահը հաշվում և բարձրաձայն հայտարարում է կողմ տրված ձայների թիվը, այնուհետև նույն կարգով հաշվում դեմ ու ձեռնպահ ձայների թիվը: Առցանց քվեարկության դեպքում Երիտասարդական խորհրդի նախագահը քվեարկության ավարտից հետո ամփոփում է արդյունքները և այդ մասին տեղեկացնում է Երիտասարդական խորհրդի անդամներին էլեկտրոնային փոստ ուղարկելու կամ սոցիալական ցանցի համապատասխան խմբում տեղադրելու միջոցով:

4.7. Քվեարկության արդյունքներն արտացոլվում են Երիտասարդական խորհրդի նիստի արձանագրության մեջ: Նիստի արձանագրությունը կազմվում է նիստի ավարտից հետո եռօրյա ժամկետում: Երիտասարդական խորհրդի նիստերի արձանագրումը կազմակերպվում է Երիտասարդական խորհրդի նախագահի կողմից: Փաստաբանների պալատի խորհրդի նիստի արձանագրությունը ստորագրում է Երիտասարդական խորհրդի նախագահը:

4.8. Երիտասարդական խորհրդի կողմից ընդունված որոշումները կարող են կազմվել առանձին ակտի (որոշման) ձևով: Առանձին ակտի ձևով կայացված Երիտասարդական խորհրդի որոշումը ստորագրում է Երիտասարդական խորհրդի նախագահը:

4.9. Երիտասարդական խորհուրդը Պալատի նախագահի առաջարկությամբ կարող է մասնակցել Պալատում կամ «Փաստաբանական դպրոց» հիմնադրամում իրականացվող միջոցառումներին:

4.10. Երիտասարդական խորհուրդն իր որոշումներով հաստատում է եզրակացություններ, առաջարկություններ կամ ուղերձներ:

4.11. Երիտասարդական խորհրդի որոշումներն ունեն խորհրդակցական բնույթ:

4.12. Երիտասարդական խորհրդի գործունեության հետ կապված ծախսերը փոխհատուցվում են Պալատի բյուջեից՝ Պալատի նախագահի հետ նախապես ծախսերը համաձայնեցնելու պայմանով:

5. Երիտասարդական խորհրդի նախագահի և անդամների լիազորությունների դադարեցման կարգը

5.1. Երիտասարդական խորհրդի նախագահի կամ անդամի լիազորությունները վաղաժամկետ կարող են դադարեցվել Պալատի նախագահի նախաձեռնությամբ, ինչպես նաև Երիտասարդական խորհրդի նախագահի կամ անդամի կողմից այդ մասին Պալատի նախագահին գրավոր դիմում ներկայացնելու դեպքում:

5.2. Երիտասարդական խորհրդի նախագահի կամ անդամի լիազորությունները համարվում են դադարած Պալատի նախագահի որոշման կայացման պահից, իսկ սույն Կանոնակարգի 5.1. ենթակետում նշված դեպքում՝ դիմում ներկայացնելու հաջորդ օրվանից:

6. Եզրափակիչ դրույթներ

6.1. Սույն կանոնակարգն ուժի մեջ է մտնում ընդունման պահից:

6.2. Սույն կանոնակարգում փոփոխություններ և (կամ) լրացումներ կարող են կատարվել միայն Պալատի նախագահի որոշմամբ: